

Headline	Penduduk desak TNB tukar laluan PROJEK TALIAN		
MediaTitle	Berita Harian		
Date	16 Apr 2019	Language	Malay
Circulation	82,252	Readership	246,756
Section	Nasional	Page No	63
ArticleSize	478 cm ²	Journalist	Oleh Norzamira
PR Value	RM 47,484		



PROJEK TALIAN PENGHANTARAN ELEKTRIK

Penduduk desak TNB tukar laluan

➔ Cadangan projek babitkan kawasan kediaman, kebun

Oleh **Norzamira Che Noh**
bhnews@bh.com.my

► Tanjung Karang

Pemilik 255 lot tanah di daerah Kuala Selangor dan Tanjung Karang mendesak supaya laluan projek talian penghantaran elektrik Tenaga Nasional Berhad (TNB) dari pencahangan masuk utama (PMU) Sungai Manik ke PMU Kuala Selangor ditukar.

Ia berikutan laluan dicadangkan TNB bagi projek itu melalui tanah milik penduduk berkenaan yang antara lain membabitkan kawasan kediaman dan kebun.

Seorang daripada pemilik tanah terbabit yang juga peguam, Mohaji Selamat, berkata pengambilan tanah untuk projek itu membabitkan daerah Kuala Selangor, Tanjung Karang, Sungai Besar dan Sabak Bernam.

"Pengambilan tanah berkenaan masih pada peringkat cadangan. Surat dikeluarkan pada Oktober tahun lalu dan penduduk ada tem-



[FOTO NORZAMIRA CHE NOH/BH]

Penduduk pada sesi dialog mengenai projek talian penghantaran elektrik TNB dari PMU Sungai Manik ke PMU Kuala Selangor di Pusat Khidmat Homestay Sungai Sireh, Tanjung Karang, baru-baru ini.

poh 12 bulan membantah cadangan itu.

"Pada Februari lalu, kami menghantar memorandum berserta cadangan laluan baharu yang tidak perlu melalui tanah milik penduduk, kepada Pejabat Tanah dan Daerah Kuala Selangor, Pejabat Menteri Besar, TNB dan beberapa pihak berkaitan.

"Bagaimanapun hingga kini, masih belum mendapat maklum balas daripada mereka," katanya ketika ditemui pada sesi dialog di Pusat Khidmat Homestay Sungai Sireh, di sini, baru-baru ini.

Yang turut hadir pada sesi dialog

itu ialah Ahli Dewan Undangan Negeri (ADUN) Sungai Burong, Datuk Mohd Shamsudin Lias.

Tanah rizab Melayu

Mohaji berkata, tanah di kampung terbabit adalah rizab Melayu yang rata-rata penduduk mewarisinya daripada ibu bapa mereka.

Katanya, mereka jelaskan bahawa projek itu adalah projek rakyat dan bukan membantah sebab mementingkan diri.

Sebaliknya, beliau berkata, bantahan dibuat kerana ada jalan alternatif yang boleh digunakan, selain melalui tanah milik pen-

duduk kampung terbabit.

"Kami mencadangkan hutan simpan bersebelahan dijadikan laluan projek berkenaan dan mengikut Seksyen 11 Akta 313 (Akta Perhutanan Negara 1984), kerajaan negeri boleh mengeluarkan rizab hutan simpan untuk tujuan pembangunan," katanya.

Mohd Shamsudin pula berpendirian sekiranya kes terbabit dibawa ke mahkamah, agak sukar untuk penduduk menang kerana projek berkenaan dilakukan untuk kepentingan awam dan bukan individu.

"Penduduk boleh membantah,

tetapi harus bersepadu dan sepakat. Jika boleh, dapatkan maklumat lengkap penduduk kampung lain yang ingin membantah cadangan laluan itu bagi meyakinkan pihak kerajaan negeri serta TNB," katanya.

Sementara itu pada perkembangan terbaru, Mohaji berkata, Jawatankuasa Barntahan Projek TNB Mukim Tanjung Karang sudah menyerahkan memorandum baharu, semalam, supaya Pejabat Tanah dan Daerah Kuala Selangor mempertimbangkan pengambilan rizab hutan simpan untuk menggantikan laluan projek berkenaan.